



La giuria dal Premi Term Bel, Bertilla Giossi, Rico Valär, Chatrina Josty e la moderatura Romana Costa.

FOTOS F. ANDRY

## Sin lautget cun Asa S. Hendry

■ (anr/fa) Avant trais onns ha Asa S. Hendry publictà in cudesch ensemen cun Flurina Albin, avant dus ha ella survegni il Premi Term Bel e quest onn è cumparida sia pli nova publicaziun cun il titel «Sin lautget». In inscunter sin lautget. Savur da primavaira, fim da cigarettas ed ils plets dad Andreas Walser. Ina giuvna numnada Emma ed in autur s'entaupan ed exploreschan lur cunfins en quell'amicizia nunusitada. Sonda ha la giuvna autura Asa S. Hendry preschentà als Dis da litteratura a Domat ses debut cun il titel «Sin lautget» cumpari tar la Chasa Editura Rumantscha (CER). Esther Krättli ha moderà la preschantaziun da «Sin lautget». En il raquint descriuva l'autura oriunda da la Lumnezia a moda decidida e per part radicala la vita da la giuvna Emma. La lectura da las brevs dad Andreas Walser – in giuven artist da Cuira ch'è sa rendì dal 1928 cun 20 onns a Paris e mort là mo dus onns pli tard en consequenza d'ina vita destructiva cun grond consum da drogas – sa maschaida tras il raquint cun la vita dad Emma. Asa Stina Hendry lascha prender part als lecturs a la vita da la figura Emma en ina fa-



L'autura Asa S. Hendry che fascheva in mument ses patratgs en il sulegl davant la chasa da scola Tircal.

sa plain plaschair da viver e meraviglias da scuvrir, en ina fasa da sex, drugs and rock'n roll». La scriventa ha in grond power e ristga da duvrar il rispli sco scalpel e furar là nua ch'i fa mal. Asa S. Hendry è creschida si a Vella en Lumnezia ed


ha gist fatg la matura a la scola chantunala a Cuira. Ensemen cun Flurina Albin ha ella publictà dal 2015 tar la CER il cudesch «Emalio». L'onn suenter ha ella guadagnà als 26avels Dis da litteratura il Premi Term Bel.

## Istorgia ed istorgias d'in vitg da randulins

■ (anr/fa) «Sguard sur la saiv» sa numna la Chasa Paterna ch'è gist cumparida. La publicaziun cuntogna raquints, reminiscenzas ed anecdotes da la vita a Sent, scrits da l'autura Olga Prevo-Bazzell. La Chasa Paterna, la revista annuala da l'Uniuin dals Grischs, è deditgada quest onn ad Olga Prevo-Bazzell. Per ses otgantavel han

ses figls Jachen e Claudio Prevost fatg il regal da procurar la pussaivladad d'edir ina tscherna da ses raquints. Durant sia entira vita ha l'autura scrit. En occasiun dals 28avels Dis da litteratura a Domat han Olga Prevo-Bazzell e Dumenic Andry che ha fatg il lectorat preschentà questa nova publicaziun. L'autura è naschida dal 1937 a Sent e creschida si en in am-

bient puril. Pli tard ha ella vivi cun sia famiglia a Ramosch, dapi blers ons puspè a Sent. L'impuls da scriver istorgias e poesias aveva ella survegni durant il temp da scola da ses magisters. In stimpel ha er dat Jon Pult da la giuria tar la concorrenza da cumponiments rumantschs per scolaras e scolars da l'otg- e la novavla classa dal 1952 cun la surdar il «Premi Peider Linsel». Ils utims onns s'ha Olga Prevo-Bazzell puspè deditgada pli intensivamain a sia gronda paschiun. Ella ha scrit e ramassà bleras istorgias, reminiscenzas, raquints ed anecdotes. «Quellas muossan in fin umur, in grond d'observaziun e sensibilitad ed ina fig bunna memoria», ha ditg Dumenic Andry. «ses texts en documents prezios per l'istorgia locala, d'in ambient e d'in temp, ed illustreschan la mentalitad en Engiadina Bassa.» Diversas da sias istorgias èn gia vegnidas publicgadas en il Chalender Ladin. La Chasa Paterna nr. 136 «Sguard sur la saiv» è l'emprima collecziun che dat ina survista pli vasta. En ses raquints scriva l'autura era da sia famiglia da randulins e da lur vita a l'ester. Uschiglio quinta ella surtut da la vita culturala dal vitg. Ella menziuna p.ex. la sala veglia en l'hotel Rezia ch'era vegnida fabricada al cumenzament dal 20avel tschientaner. «En questa sala cun ina pitga amez faschevan ils da Sent lur festas e ballavan enturn quella», ha ditg Olga Prevo-Bazzell, ed agiunt riend, «ils da Sent gevan enturn la pitga».



Olga Prevo-Bazzell prelegia or da la nova Chasa Paterna chi cuntogna da ses texts, daspersa Dumenic Andry che ha fatg il lectorat.



Philippe Bischof, dapi in onn president da la Pro Helvetia, è er stà preschent als Dis da litteratura a Domat.



Il team en cuschina ha procurà per il bainstar dals blers preschaints.



Mevina Puorger e Letizia Könz han discuri davart «La scuvierta da l'orma», quatter novellas da Selina Chönz reedidas.



Quest onn ha prelegì l'actura Marietta Jemmi ils texts inoltrads per la concorrenza dal Premi Term Bel.



La collavuratura Marcellina Cathomas tar la maisa da la LR che cuntegniva puspè ina gronda tscherna da novas publicaziuns rumantschas.